

## "De Wingert hinnerm Haus"

Ich hab in Wingert hinnerm Haus,  
der füllt mei ganzi Freizeit aus.  
In alte Wingert aus knorrig Holz,  
doch er is mein ganze Stolz.  
Wie gern du ich mich drin verweile  
in meine eegene acht Wingertszeile.  
Im Lewe mecht ich ihn net misse,  
wann ich hab ach schun viel drin schwitze misse.  
Du muscht hacke, zackre, schwefle, schbritze,  
gucke, daß die Stiwwel richtich sitze.  
Im Frihjohr muscht die Rewe schneide,  
anschließend anbinne mit de Weide.  
Muscht Laab abmache, die Dräht mol spanne,  
Ärwet, Ärwet hinne un vorne.  
Jetzt hab ich mer so viel Müh gemacht,  
und stehts Laab in voller Pracht.  
Hoff ich uff gut Wetter un Sunneschei,  
denn als Lohn mecht mer doch in gute Wei.  
Hoffentlich kenn Hagelschlag un Gewitter,  
dann wer alles aus un des wer bitter.  
Doch, denk ich, Petrus macht kee Faxe  
un loss mer scheene Traube wachse.  
Strahl viel Sunn in unser Pälzer Ländel rei  
mer trinken doch so gern in gute Wei.  
Hott de Petrus mei Gebet erhört,  
mer dann in volle Wingert bschert,  
fang ich im Herbscht mit leese an,  
schdell dann die ganz Verwandtschaft dran.

Gude Trauwe gewwen in gude Moscht,  
do werd de Bitzler brobiert bis in "Gaser" hoscht.  
Mit vier bis fünf Halwe brummscht mitm Kopp gege die Wand  
mei Fraa tobt: "Hoscht dann Du iwwerhaupt keen Verschdand?"  
Ich sag: "Fraa, des kannschd Du net verschdeh,  
is mein Wingert ach noch so klee,  
do kannscht dowe un schelde wi d' witt,  
mit dem Droppe kummt kenn Riesling un Traminer mit."  
Mei Weinche is de beschde Droppe  
un deshalb drink ich noch in Schoppe.  
Mit Genuss "putz" ich mei Quantum weg  
un sag zu mer "Proscht

August Oberbeck"